

USIM johan debat alam sekitar IPT

MELAKA - Universiti Sains Islam Malaysia (USIM) dinobatkan sebagai johan Pertandingan Akhir Debat Alam Sekitar Antara Institusi Pengajian Tinggi ke-21 yang berlangsung di Universiti Teknikal Malaysia Melaka (UTeM) di sini semalam.

Debat yang membahaskan 'Kelestarian Alam Sekitar Membina Ketamadunan Bangsa' itu turut melakar sejarah apabila wakil USIM turut menerima anugerah pendebat terbaik pertandingan dua tahun berturut-turut.



USIM yang diwakili Muhammad Irhamudin Ibrahim, Mohd. Ikhwan Mohd. Rosseli dan Mohamad Shah Izad Saleh, membawa pulang Piala Pusingan Menteri Sumber Asli dan Alam Sekitar, piala iringan, wang tunai RM8,000 serta hadiah iringan.

Mohd. Ikhwan selaku timbalan pencadang muncul pendebat terbaik membawa pulang Piala Ketua Pengarah Alam Sekitar, wang tunai RM1,500 serta hadiah iringan.

Sementara itu, Universiti Malaya (UM) yang menduduki tempat kedua membawa pulang piala iringan, wang tunai RM5,000 serta hadiah iringan.

Sebanyak 25 institusi pengajian tinggi awam dan swasta terlibat dalam pertandingan itu.

Majlis penutup disempurnakan oleh Timbalan Ketua Setiausaha II Kementerian Sumber Asli dan Alam Sekitar, Dr. Abdul Rahim Nik.